



# Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 7

KM Deeksha-i 1500m National Record tasen ka yangluogo

UK-i Israel dang nok-nü ayokba anenra Hamas ajangzüksü



VOL. XXI ISSUE NO. 210 (ADOK 210) DIMAPUR TENTONÜ (MONDAY) MONUPII (MAY) 13, 2024 ₹ 5.00

## Nurses tem ya health care system tongtoret lir: CM Rio

**Dimapur, Monupii/May 12 (TYO):** Alima tesem ajunga nung International Council of Nurses ajanga shimba "Our Nurses. Our Future. The economic power of care" omen nung ajemdaker Deobarnü International Nurses' Day mungogo.

Alima nung nurses temi mapa tajung inyakba aser takok anguba bilemteta aser akhum agüja küm shia May 12 nü iba anogomung ya amunger. Ajidang masü iba anogo nung modern nursing tenzükla Florence Nightingale

asoba bilemteter.

International Nurses Day nung nurse ajunga dangi salem abenba mapang Nagaland Chief Minister Neiphu Rio-ia parnoki anibelem mesasai nüburttem tenzükla atema tenüngsang agüja liasü.

Nurses tem ya asen health care system nung tongtoret lir aser parnoki temlungtetba tulu nung bendanga agütsür temeim nung nüburttem anepaluba kisung masü saka asen rongsenketzunga renlokdahtsür, ta CM Rio-i ashi.

## Phase 4 buba Lok Sabha elections atema ajak renema lir

**Dimapur, Monupii/May 12 (TYO):** Lok Sabha elections 2024 nung phase pezü buba Hombarnü (May 13) agitsü atema mera ajak agia renema lir.

Phase pezü buba nung state toku aser union territory ka nungi constituency 96 nung election agitsü. Itemji Andhra Pradesh nung menden 25, Telangana nung menden 17, Uttar Pradesh nung menden 13, Maharashtra nung menden 11, Madhya Pradesh nung menden ti, West Bengal nung menden ti, Bihar nung menden pongu,

Lok Sabha elections 2024 phase pezü buba nung candidate 1,717 tokteptsü. Vote ya anepdang 7:00 ako nungi agütsü tenzüksü aser nikondang 6:00 ako nung tembangtsü.

General Elections 2024 nung tang tashinung phase asem lemsar states aser union territory 20 nungi Parliamentary Constituency 283 atema election tajungtiba nung agia lir.

## May 15 tashi NE nung tzünglu arutsü: IMD

**Dimapur, Monupii/May 12 (TYO):** Nagaland aser tanüngba northeast states tem tesem kar nung May 15 tashi tzünglu terara maneni arutsü, ta India Meteorological Department-i takzüteta lir.

Iba sülen yipru, tsüngi aser mopung ghonda ka nung kilometre 40 tashi kera aontsü amai lir. Ano May 16 nungi 18 tashinung tzünglu ya tesashiba akumtsü amai takzüteter, ta ashi.

## Alima tesem ajunga nung Mother's Day mungogo

**Dimapur, Monupii/May 12 (TYO):** Deobarnü alima tesem ajungalen Mother's Day mungogo. Küm shia iba anogo ya May ita Deobar tanabuba nung tetsütem dang tepela sayua aser tushia amunger.

Nagaland nunga iba anogo ya tenüngsang agüja mungogo, aser tanur tain ajaki pei tetsü dang akumtsübo aser temeim sayua akokeri sempet alija aser Tsüngrem dang pei tetsü anema aser arishia yujang ta sarasadema munga liasü.

State nung Arogo ajak nung Mother's Day nungtem nung sentong balaka agia liasü.

Mother's Day ya United States nung West Virginia kübok Grafton nung aliba St. Andrew's Methodist Church nung Anna Jarvis-i tetsü bilemteta 1908 küm mezüng munga liasü.

Maneni International Mother's Day nungtem nung Indian Army-ia Northeast nung aliba state balala nung "Mother - The First Protector" omen nung ajemdaker sentong balala agia liasü.

Tetsü temi asadangtsü mokoki temeim mapa inyakba atema akhum agüja Indian Army-

i kin balala den tetsü temeim tali angatetdakja sentong ayongzük.

Barjala, Agartala nung aliba 'Apna Ghar' old age home nung sepaitemi sentong tajung ka ayongzükba liasü. Iba tesem nung tepela lemsatempa sentong ayongzükba den külemi chiyongtsü agüja liasü.

Kasa mapang Manipur kübok Bishnupur district nunga tetsü 14 aser parnok indang kinü tanur nem medical aid agüja liasü.

Iba mapang army doctor temi parnok temang kanga junga reprang aser nungdakba mozü agüja liasü.

Imphal East district nunga army temi Awareness Capsule ka ayongzükba tetsü aser kinü tanurtem atema awareness agütsü.

Women Civil Society Organisations (CSOs) aser NGOs tem den mapang shia sensaksem akaba ajanga Indian Army-i pei chirnur takum jenjang yangluba nung tetsü shilem tali angatetdakja arur, ta Manipur, Nagaland aser Southern Arunachal Pradesh indang PRO, Ministry of Defence ajanga sangdong ka nung ashi.

## Nagaland sorkari Political Affairs Committee tentetshio

**Kohima, Monupii/May 12 (TYO):** Mapang talangka benshia aruba Naga Political Issue tatem kati arutsü asoshi lenmang bushitsü atema Nagaland sorkari ano maneni 'Political Affairs Committee (PAC)' tentetshio.

Brehostibarnü Chief Minister Neiphu Rio lenisüba kübok high level political meeting ka Brehostibarnü amendang PAC ya tentet, ta sorkar indang odongtar aser Minister, Parliamentary Affairs, K G Kenye-i Deobarnü sangdong ka nung ashi.

PAC nungya tang aliba Nagaland Legislative Assembly (NLA) nungi Council of Ministers aser political party ajak

indang legislature leaders tem dena lir aser parnok ya iba Indo-Naga yimten ken o temelaba aser tajungba nung jembitsü asoshi teyarir ka ama alitsü, ta pai ashi.

Tekeraba nung ajaki mulungtepa ken o tatem kati arutsü asoshi opposition maliba aser party ajak aliba sorkari meranga lenmang bushiba nung asendenshitsü mechi PAC ya ano shimshi, ta ashi.

Iba dak sendakba nung legislature party lenir ajak dang iba ken o atema pei party organisations den shisa agitepa "Political Consultative Committees (PCCs)" kumtetsü totuyuba agütsüogo, ta Minister

Kenye-i ashi.

PCCs nung züngsem ya 14th NLA nung aliba legislators den apet asütsü aser MLAs 10 aser timba alirba party ajanga züngsem tenet aliba committee shimtsü, MLAs 5 aser tema aliba party temi züngsem pongu aliba committee shimtsü, MLA ka aser tema aliba party temi züngsem asem aliba committee shimtsü, Independent MLAs - convenors & convenors asütsü, ta pai metetdaksü.

Kenye-isa party balala dang iba maparen tekeraba nung inyaker PPC züngsemtem tenüng pa nem tekeratiba nung agütsütsü ashi.

## May 14 nü 132 kV Kohima-Chiephobozou Transmission line shibangtsü

**Dimapur, Monupii/May 12 (TYO):** Zhadima village, Nerhema village, Phezha village, Thisama village aser Meriema village, Nagaland university ajanga aoba 220/132 kV Zhadima (New Kohima Sub-station) nung aliba 4 Nos. of 132kV Bays, 220/132 kV Zhadima (New Kohima Sub-station) nung LILO 132kV Kohima-Wokha aser Nagaland University Sub-station nung 132/33kV, 2x25 MVA den Zhadima nungi Nagaland University tashi 132kV D/C Transmission Line tem May 14, 2024 anepdang 9:30 ako nung rated voltage nung test charged

asütsü aser iba sülen charged süa alitsü, ta Er. Namheu Khate Zeliang, Executive Engineer, Transmission Division, Kohima ajanga sangdong ka nung metetdaksü.

Anungji shia aliba Transmission line nung mokongshitsü mesüra anasai maotsü nüburttem ajunga dang metetdaksür. Shirnoki yamaji inyakdir pei khuret asütsü aser timtem kar danga adokra Department of Power khuret masütsü, ta sangdong ajanga ashi.

Maneni LILO line test charging asütsü atema 132 kV Kohima-Chiephobozou

Transmission line ya May 14, 2024 anepdang 7:30 ako nungi 9:30 ako tashi shibangtsü.

Iba shutdown yagi Wokha, Tseminyu, Pughoboto aser Northern Angami Kohima tesemtem nung kongshitsü aser temelen power supply agütsütsü asoshi Wokha district kübok Riphym Old anasa One 132kV Tower AP No. 16 laoba ajanga 132 kV Wokha-Sanis Transmission line raksar lir, ta ashi.

Anungji iba power shutdown mapang nüburttemi timtem arema atatsü aser amalitep akatsü ayongzükter, ta sangdong ajangasa ashi.

## Sam Pitroda-i jembiba nung Congress maden: NPCC



Indian Overseas Congress Chairman, Sam Pitroda

**Dimapur, Monupii/May 12 (TYO):** India nung nisung kin balala aliba indang taoba Indian Overseas Congress Chairman Sam Pitroda-i rateta ashiba All India Congress Committee (AICC) ajanga magizükba ama Nagaland Pradesh Congress Committee (NPCC)-ia pai pa tangatetba nung iba o jembiba aser yangji Congress Party shilem kecha mali, ta Deobarnü sangdong ka ajanga ashi.

"Sentsü aser tamangba yimsü mebandangi kin ajunga tejangraba wazüka ayutsü asoshi bendanga agütsür nokdaka lir aser India nung kin balala alima kanga akumtsübor," ta NPCC indang communication department ajanga sangdong nung ashi.

Congress tamendak dak aser tangatetba tejangja shiaka BJP-i iba ken o politicise asütsü merangba atema kanga sasar aser iba ya ajanga tang agiba election

nung parnoki tamakok angutsü tejangja sayur, ta Pradesh Congress ajanga ashi.

"Tesüiba mapang aser tawa tanü BJP lenirtemi iba ama mesüra tamajungba ken o nung denaka party nungi taitsüba kecha meliasü aser tang tensa den par inyakyim medemdangra BJP indang anemsü jakla tali jangjar," ta ashi.

BJP nungi Union minister Giriraj Singh-i 2015 küm, taoba BJP MP Tarun Vijay-i 2017 küm aser BJP youth wing indang taoba national vice president Santosh Ranjan Rai-i 2021 nung jembiba nunga tai aputsüsa temang tereprangtsü balala nung ajemdaker jembiba liasü, ta NPCC ajangasa ashi.

Tawa Pitroda-i India nunger south tsütsü alir ya Africa nunger mesüker, anüolen alirtem ya Arab nunger mesük aser antüdoklen alir ya China nunger mesüker ta jembiba mechi mangatetpet adoka liasü.

# Manipur nung Myanmar nunger migrants 5,457 lir



Myanmar nungertem Churachandpur district nung apuba noksa nung angur.

**Imphal, Monupii/May 12 (Agencies):** Manipur kübok Kamjong district nung kuli kaket tejangja maliba Myanmar nunger shirnok tang tashi nung jangjar lir, parnok rongnung 15 süogo, 359 pei mulungka nung Myanmar-i meyipaogo aser tanungba 5,457 district nung camp balala nung jenoka lir.

Myanmar nung tang mepetmesü tulu adoker aliba ajanga nüburtem aika Manpur-i senoka aitar, ta ketsürtemi Deobarnü metetdaksü.

Migrant 5,457 ya iba tesem nung aliba nüburtem nungi pilar camp ti nung jenoka lir.

Item camp tem ya yimtsung balala nung committee temi achaayangdar aser chiyongsü aser teningdakba oset balala District Administration-i agüja arudar. Migrant tem nem District Administration-i identity card agütsüogo aser camp tem nung nisung kwi ali aji jangjatsü

atema mapangshia nisung züngdanga arudar.

Osang ajanga ashiba agi, migrant tem aikati Myanmar-i meyipa oa alu ayimtsü atema jangraba lemsatepogo, ajisüaka Myanmar military-i asendenshir tesem balala nung bomb pokloktsüba ajanga parnok tsübuteper aser par linüki meyipa aotsü atema arendaker.

Kamjong District Administration aser Police nati biometric registration, camp nung security akangshiba aser teyari balala agütsüba amala jongkdak nungdakba maparentem achaayanga arudar.

Manipur Chief Secretary lenisüba nung Kamjong district nung tensa dak sendakba nung senden ka May 10 nü amenba sülen kuli kaket tejangja maliba migrant 284, shirnok tang tashi züngoksema mali parnok indang biometric data upload asütsü teletetba agiogo.

Iba den bendenloksema district administration-i, takaratiba nung camp tem nung migrant tema ajak verification agishitsü. Police Department-i district nung aser talisa camp temeket nung security akangshitsü. Myanmar nung tensa tajungba akümba sülen özüng alema arua aliba migrant tem meyipa yok tenzüksü.

Maneni state sorkari migrant tem jenoka aliba tesem tasentem jangja biometric registrations agitsü atema Special Police Team ka tentetsüogo.

Myanmar den arrtsü nung aliba Ukhrul, Kamjong, Tengenoupal, Chandel, aser Churachandpur district tem nung özüng alema state-i aiterem asadanga atatsü aser mapang shitak nung Ministry of Home Affairs nem metetdaksütsü atema Nodal Officers tem shimogo.

# Totzü abenba train Tripura tongogo



**Agartala, Monupii/May 12 (Agencies):** Hopta anashi totzü agi anüingba sülen Tripura-i totzü abenba train ka tongaogo.

Assam nung Dima Hasao District kübok Jatinga Lumpur - New Harangajao section nung lenmang mejungi liaka iba train ya kanga kümdanga anir oa Tripura tongtetogo.

North Eastern Frontier Railway Chief Public Relations Officer Sabyasachi Dey-i, petroleum products (BTPN) atema 49 Bogie Tank wagons convoy ka Assam nungi apusogo aser Jatinga Lumpur tesem kanga kümdanga ajanger Tripura tongtetogo.

"Train nung High-Speed Diesel (HSD) wagons 19 aser Motor Spirit/Petrol (MS) wagon 30 bener tanü 10:41 ako shi nung Jatinga Lumpur - New Harangajao section ajangaogo. Train ano Dharmanagar, Tripura matong lir," ta ketsürtemi yagi metetdaksür liasü.

Train ya Dharmanagar depot tongaogo aser iba ajanga state nung totzü agi anüingba ajanga timtem ajangshia aliba bentetsütsü.

Kasa mapang nung Tripura indang Chief Minister, Manik Saha-i, social media sabang ka ajanga pa kanga pelaba lemsatep. "Tanü ya kanga

tongtibang anogo ka lir. April 26 nü sülen tanü mezüngbuba Jatinga aser Haranga na tsüngda anentsüh agi kongshir aliba tesem ajanga POL (Petroleum, Oil, aser Lubricants) bener train ajangtetogo," ta pai ashi.

"Takarataba nung jenjang tapet agitsüba atema ni Union Railway Minister Shri Ashwini Vaishnav, NFR ketsürtemi aser parnok kübok mapa inyakertem aser Tripura nungertemi kanga aremzüka ataba atema kanga pelaba lemsateper. Iba train tonga aruba ajanga state nung timtem aliba bentetsü," ta Chief Minister-i ashi.

# Arunachal: ECI-i LS election mapang booth amokbangba indang osang meshi

**Guwahati, Monupii/May 12 (Agencies):** Arunachal Democratic Party (ADP)-i tashishiba ka benokba sülen Election Commission of India (ECI)-i, state aser Lok Sabha election agiba anogo Lower Siang district kübok Nari-Koyu assembly constituency nung polling booth amokbangba indang osang tejangja meshiogo.

ADP lenirtemi May 2 nü ECI nem iba tashishiba ya agüja liasü. Parnoki ashiba agi, district aser state-level electoral ketsürtemi booth amokbangba dak sendakba nung telangzüba tajung magütsür. Iba sülen May 6 nü ECI-i, state CEO dang iba tashishiba dak sendakba nung osang tejangja agütsütsü tetuyuba agüja liasü.

Taoba Arunachal Pradesh CM Gegong Apang, shiba ADP lenir aser 36-Nari-Koyu constituency indang candidate lir, pai anir party züngsemtemi Saku, Sipu, Tabiripo, Kakki, aser Potte polling station tem nung vote agütsüshitsü atema mepeshia asüngdangogo.

BJP züngsemtemi Polling booth tem amokbangba aser election ketsürtem amokmerenba indang ken o temai adokba sülen ECI-i iba tetuyuba ya agüja liasü.

Iba tatalokba dak sendakba nung party-i police aser ARO nem FIR aika agütsüogo, ajisüaka tang tashi nung ketsürtemi kecha jenjang agia mali, ta party-i ashi.

ADP otongdar Jhony Yangfo-

i ashiba agi, party youth wing lenirtemi Honibarnü Likabali nung Nari-Koyu constituency nung returning officer den ajurutepa liasü. Party-i ashiba agi, Nari-Koyu RO aser district election officer napronglai booth amokbangba dak sendakba nung kuli agütsütsü nongnanger.

RO den sensaksema sülen ADP lenirtemi Likabali nung osang benertem den sensaksema mapang, parnok kanga tezü adangba lemsatep aser ashiba agi, electoral officers temi documentary/video kuli meshir. Parnokisa polling station tem nung CCTV camera maliba aser polling agent temi noksa agitsü memelaba indang lemsatepa liasü.

"Onok ket nung verbal kuli aika lir aser tenük kuli agütsürtem indang kuli electoral officers tem nem agütsüogo. Ajisüaka electoral officers temi iba ya magizüker aser documentary/video kuli meshir," ta Apang indang secretary Bolmi Kaye-i ashi.

Kaye-isa, teka sangshiba aser tangar amokmerener kar anema ken o benokaka tang tashi nung kecha jenjang magiba atema kanga tezüdanga bilemba lemsatep.

ADP lenirtemi ken o dak sendakba aliba ketsürtem dang kecha tebandang makai ken o bushisüngdangtsü aser mepetmesü adokba polling station tem nung vote agütsüshitsü atema mepeshia asüngdangogo.

# Assam nung India sen taila crore 2 bener lia nisung ka apu



**Guwahati, Monupii/May 12 (Agencies):** India sen taila aika Honibarn aonung Assam kübok Dhubri tesem nung ngutetogo.

Police-i Deobarnü sangdong ka ajanga ashiba agi, sen taila den nisung ka puogo, shiba FICN dealer ka asütsü ta temulung melemer.

Sen taila ya 500 denomination nung liasü aser ajak senteper sen crore 2 liasü.

Police-i ashiba agi, osang tejangja angazükba sülen Dhirghat, Dhubri kübok Barghola tesem nung meita aoba sentong ka ayongzüka

agia liasü.

Meita aoba mapang police-i Sahinur Islam pua liasü.

Par ki kanga junga asadanga bushiba sülen sen taila crore 2 shi nguteta liasü, ta police-isa metetdaksü.

Aija alisang yagi ashiba agi, sen ya lemshitsü aser lemshirtem tem dang sen lakh 7 agi ayoktsü liasü.

Police-i pa dang ken o ashishioogo aser maneni bushisüngdangdar.

Maneni "black magic" amshiba atema iba tesem nung alirtemi Islam aitsür lir.



School of Nursing, Impur nung Honibarnü International Nurses Day amungba mapang kaketsürtemi ken ka atenba noksa nung angur.



May 12, 2024 nü Mumbai nung Congress lenirtem- Shashi Tharoor, Vijay Wadettiwar aser Naseem Khan nungeri osangbenertem den jembidang tangokba noksa nung angur.

### Tanü Lok Sabha constituency 96 nung election agitsü

**New Delhi, Monupii/May 12 (Agencies):** Hombarnü states aser union territories 10 nung Lok Sabha elections shilem pezübuba nung menden 96 atema election agitsü.

Lok Sabha election shilem pezübuba nung Andhra Pradesh nung menden 25, Telangana nung menden 17, Uttar Pradesh nung 13, Maharashtra nung 11, West Bengal nung 8, Madhya Pradesh nunga 8, Bihar aser Jharkhand na nung menden pongugu, Odisha nung pezü aser Jammu & Kashmir nung menden ka atema election agitsü.

Election Commission of India-i, election shilem pezübuba nung Lok Sba menden 96 atema candidate 1,717-i toktepsü aser ibaji menden shia lemtsüra menden ka nung candidate 18-i tokteper ama asütsü, ta metetdaksü.

Election shilem pezübuba nung vote agütsütsü temsüa alir crore 17.70 lir aser iba nunggi tebur voters crore 8.97 aser tetsür voters crore 8.73 densema lir.

"Arrshi küm 85 ser temapur voters lakh 12.49 aser matamabensar voters lakh 19.99 lir," ta Election Commission-isa metetdaksü.

Lok Sabha election shilem pezübuba nung tongtibang candidates aser parnok toktepsü constituencies yamai alitsü- West Bengal kübok Baharampur menden nung Trinamool Congress (TMC) candidate aser taoba mapang

cricketer, Yusuf Pathan-i West Begal Congress Tir Adhir Ranjan Chowdhury aser BJP candidate, Nirmal Kumar Saha na den toktepsü.

Hyderabad Lok Sabha menden nung Bharatiya Janata Party candidate, Madhavi Latha-i All India Majlis-e-Ittehadul Muslimeen tongti lenir aser MP, Asaduddin Owaisi den toktepsü. Iba menden nung Owaisi-i pezüen tashi takok ngua liasü.

West Bengal kübok Krishnanagar menden nung BJP candidate, Amrita Roy-i Trinamool Congress (TMC) lenir, Mahua Moitra den toktepsü. 2019 küm Lok Sabha election nung Mahua Moitra-i vote 614,872 ngua BJP candidate Kalyan Chaubey aser CPI(M) nungi Shantanu Jha na madak takok ngua liasü saka yaküm Mahua Moitra Lok Sabha nungi anenja liasü.

Bihar kübok Begusarai nung BJP lenir Giriraj Singh-i CPI candidate Awadhesh Rai den toktepsü. Taoba election nung Giriraj Singh-i CPI nungi Kanhaiya Kumar madak takok ngua liasü.

Bihar kübok Munger nung Janata Dal (United) lenir Rajiv Ranjan Singh (Lalan Singh)-i RJD lenir Anita Devi den toktepsü. Taoba election nung iba menden nung Lalan Singh-i RJD candidate Neelam Devi madak takok ngua liasü.

Srinagar nung National Conference lenir Aga Syed Ruhullah Mehdi-i PDP lenir

Waheed Parra aser Apni Party lenir Mohammad Ashraf Mir na den toktepsü.

Uttar Pradesh kübok Kannauj menden nung Samajwadi Party Tir Akhilesh Yadav-i BJP lenir aser MP, Subrat Pathak den toktepsü. 2000 nungi 2012 küm tashi iba menden nungi Akhilesh Yadav Lok Sabha MP liasü saka pa Uttar Pradesh Chief Minister akümba sülen pai iba menden nungi anena liasü.

Andhra Pradesh kübok Kadapa menden nung Andhra Pradesh Congress Tir, YS Sharmila-i lar kinünger aser YSRCP lenir MP Avinash Reddy den toktepsü.

Jharkhand kübok Khunti nung BJP lenir aser MP, Arjun Munda-i Congress candidate, Kali Charan Munda den toktepsü.

Hombarnü Andhya Pradesh nungbo Lok Sabha election denji külemi assembly menden 175 atema-a election agitsü. Andhra Pradesh nung YSRC, Congress-i aniba INDIA teoktep aser BJP-i aniba teloktep party tem tsüngda toktepsü.

Iba dak alia Odisha nunga legislative assembly menden 28 atema eletion agitsü.

Lok Sabha election shilem pezübuba agi tashi nung menden 379 atema election agir asütsü aser tanüngba menden 164 atema May 20, May 25 aser June 1 anogotem nung election agiba sülen June 4 nü vote azüngtsü.

### PM-i takar 4-5 nem dang linük rongsen ajak agütsür: Priyanka Gandhi

**New Delhi, May 12 (Agencies):** Amongnü Congress lenir, Priyanka Gandhi Vadra-i, Ato kilonser Narendra Modi-i kanga takar nisung pezü-pongu nem linük rongsen ajak agütsür, ta tai tongloksü.

Rae Bareli Lok Sabha menden nung candidate aser tedi, Rahul Gandhi atema nüboyimtsüba sentong nung jembidang Priyanka Gandhi-i, "Tesüiba küm 10 tashi Narendra Modi ya Varanasi nungi MP lir, ajisüaka pai yangji yim ka danga mesemdang mesüra aluyimer ka dang danga parnok koma alirar masüngdang," ta ashi.

Laisa, "Privatisation ji tamajung masü, ajisüaka Ato kilonseri linük rongsen ajak kanga takar nisung pezü-pongu nem dang agütsüra, ibajibo tim masü," ta ashi.

Tanübo linük nung koila, electricity, ports aser airports ajak Ato kilonser Modi'er medemertem ket nung lir, ta Priyanka Gandhi-i ashi.

Taoba mapang Ato kilonsertem- Rajiv Gandhi aser Indira Gandhi na tetshia Priyanka Gandhi-i, parnokibo yimtsüngtem semdanga nüburtem dang parnok tebilemtsü onük balala asüngdanga liasü, ta ashi.

### Nijjar khasetba ken o nung Canada-i ano India nunger ka puogo

**New Delhi, May 12 (Agencies):** Yaküm Canada nung Khalistani separatist lenir, Hardeep Singh Nijjar khasetba ken o dak sendakba nung tawa Canada ketdangsertemi India nunger asem apuba sülen Honibarnüa parnoki ano India nunger ka puogo.

Canada nunger ketdangsertemi arrshi küm 21, Amardeep Singh apu.

Surrey nung alir Amardeep Singh anema nisung tepsetba aser nisung tepsettsü atema

asalentong yangluba ken o benokogo.

Nijjar tepsetba ken o dak sendakba nung May 3 nü Canada ketdangsertemi India nunger asem- Karan Brar (22), Kamalpreet Singh (22) aser Karanpreet Singh (28) nunger pua liasü.

Yaküm June 18 nü Canada nung Khalistani lenir, Hardeep Singh Nijjar khasetba nung India sorkari shilem agia lir, ta Canada-i tai tongloksüba sülen linük ana tesendaktep raksaogo.



May 12, 2024 nü New Delhi nung osangbenertem senden ka nung Delhi Chief Minister Arvind Kejriwal aser Punjab Chief Minister, Bhagwant Mann nati osangbenertem senden ka nung Lok Sabha election atema 'Kejriwal ki Guarantee' tenangzükbatem sayadang tangokba noksa nung angur.

### Sonia Gandhi-i MP fund shilem 70 minorities nem agütsü: Amit Shah

**New Delhi, May 12 (Agencies):** Amongnü Rae Bareli nung election nüboyim sentong ka nung Congress lenir Sonia Gandhi aija Union Home Minister Amit Shah-i, Sonia Gandhi-i la indang MP fund shilem 70 dak temabo minorities nem lemzüksü, ta ashi.

Shah-i, "Nenoki küm aika vote agüja arur saka MP fund nungi nenoki langkabo ngur ma? Lai sen ajak indokogo. Nai mangu süra senji kongi ao? Ibaji (MP fund) parnok (Congress) indang vote bank nung indok," ta ashi.

Gandhi kibong maneni aija Shah-i, nenoki parnok nem küm aika maongka agütsüogo saka parnoki Rae Bareli nem terenlok bener marutsütet, ta ashi.

Rae Bareli menden nung BJP candidate, Dinesh Pratap Singh nem vote agüjang ta mepishia pai, party-i takok ngura Rae Bareli ya Ato kilonser Modi indang terenlok mapatongtem den sendaktepsütsü, ta nangzük.

Shah-i, Gandhi kibong ya yazü jembitsü nung mongintem lir; parnoki Telangana nung tetsürtem nem senotsü teyari agütsütsü ta nangzük, saka nangzükba ama meinyak, ta ashi.

"Nisung aikati iba (Rae Bareli) menden ya kibong ka menden ta shiogo. Aianu Priyanka-i jembiba o ni angadangogo, lai 'ozü kibong atema vote meshitsü asoshi ni aru' ta jembiba. Ibaji atangji, kechiyong Raebareli nung alirtemi küm aika Gandhi-Nehru kibong nem takok ngudaktsüogo. Ni nenok dang ya asüngdangertakok anguba sülen Sonia Gandhi aser lar kibongi Rae Bareli kwiben semdang? Rae Bareli nung lendong 40 jungnüa atalokogo saka Gandhi kibongi semdang asü?," ta Shah-i asüngdang.

Rae Bareli Lok Sabha menden atema May 20 nü election agitsü. Iba menden nung Congress lenir Rahul Gandhi-i BJP candidate, Dinesh Pratap Singh den toktepsü.



Lok Sabha election shilem pezübuba agitsü anogo ka lia May 12, 2024 nü Jharkhand state kübok Khunti nung sepaitem aser polling official tem EVMs aser election dak sendakba oset balala bener polling stations-i apusodang tangokba noksa nung angur.



# TIR YIMYIM

## YIMOBILEM (EDITORIAL)

DIMAPUR TENTONÜ, MAY (MONUPII) 13, 2024

### Election ya nübortem benjong

**A**senok asoshibo senso o senso na teka itepba raratepba, sensoi senso jentokba aser sensosanger ajak tenüng nung senso kari dang vote agütsübaji dang election asütsüa akok, saka tangar asoshibo yimten yimsüsür shimtetba election sentong aser election mapang ya nübortem yimten tangatetba nung pelatepba benjong lir. Ibayongji, yimten mapatem indang shisadangertemi election ya democracy benjong ta ajar. Atangji, yimten tashi rakteper asünungji, yimten telok balala tsüngda election nung tokteperitem rongnung onük aika benoka aitsüteper aser o tetsürok jembiteper. Item ajakji nübortem mulung akoktsü asoshi yimten lenirtemi pei teloki inyaktetba mapatem aser inyaktü bilemba nükjidongtem metetdaksübatem asütsü. Aji oda, nisung meyerijang aika sendena yur pei yimten nükjidong ashitsübaji yimten lenirtem asoshi maongka tulu aser jangratemtsüka lir. Tezüdangtsüka asen lima nungbo tesem aika nung election mapang lokti senden mayongzüker, kechiyong ayongzükyonga nisungtemi marur aser aruyonga lokti senden nung jembibaji masü saka vote melen kechi agütsür ta asübajiang asenok aikati bilemer. Ibayongji, tangarbo election lokti senden nung asem tema tsüngsangtepa pelatepa pei pei telok aser pei pei candidate yaritsü asoshi longjem dang, asenokbo telok telok tenteter sen yong vote ayoktsü candidate bushia senzüba angutsü. Aji oda, tangar asoshibo election ya benjong saka asenok asoshibo asen temeten ayokba mapang lir. Iba mapang kari pei kija vote ayoktsü, kari pei kibong ajunga ayoktsü, ano karibo peisasa telok tenteter ayoktsü aser ano karibo pei yimer aser sensosanger ajak ayoktsü aser parnok dang sensosanger ajak tenüng nung vote agütsütsü. Vote ayokba jenjang rongnung tematibaji yimer aser sensosanger ajak ayokba jenjangji asütsü südi. Tangarbo election agiba ya pei alidak kaketreju aser mozü ki tajung yanglutsütsü akokba nisung shimba mapang lir. Aji oda, parnok asoshibo election nung parnok atema lenmang tajung yanglutsütsü akokba, electricity peria bener arua agütsütsü akokba aser nisung shia amajok nung mekazüdoki pei akokba mapa langkabosa inyaka alitsü atema sentong tajung bener arutetba lenir tajung shimba mapang lir. Ano Election mapang ya tangar asoshibo shisatokdenba mapangang mesük, kechiyong iba mapang ya yimten lenirtem o nübortem na ajurutepa taoba mapangtem meyipa repranga ken o lemtepa aser tarutsü asoshi teinyaktsü sentong lemsatepba mapang lir. Aji oda, tang India ajungalen election agiba mapang yimti balala nung yimten telok balalai election senden ayongzüka agiba nung nübortem pelatepa shilem agiba jagi senso shia mulungjang nung yimten tangatetba sayur. Nübortemi yimten lenirtemi tarutsü nung parnok asoshi kechi inyaktütsü ta angatetnüba agi pei mapa ajak toktsür election senden nung oa adener aser itemji mapa küma atalokdaksünüba agi election nunga timtem aser nungsen agia vote enoktsüi aoer. Parnok asoshi election ya teimla tulu nung pelatepba mapang lir. Joko, asenoka temetetba aser tangatetba akümer asünungji, tangar amaji election ya vote agi shishilembaba mapang masü saka pei lima aser nübortem meima ochi shisatsü dener pelatepa pei yimten lenirtem shimba mapang kumdaktsütsü kanga nungdaka kumogo. Atangji, asenoka election mapang ken dena mejema tenteper saka ken olaji dang ashi, nübortemi iba ken tetezüji angateta manidakteter. Alima renloktsüba – merenloktsüba aser tejakleni aotsüba – maotsüba ajak ya yimten yimsüsürtem dak tuluka keta lir. Anungji, sen yong vote yoka adokdaksüba aser sen agi vote alia adokba yimsüsürtemibo sen dang bushitsüba dak alaka nübortema mebushitsü aser tarutsü anogotem jungdaktsütsüba shisatsüa mebushitsü. Iba ama tejakleni onüseta moudaktsüba talenba nungi asenoksasa salatsüla aser nüchi kümer election ya yimsüsürtem shimba nübortem benjong ka kümer, pei temeten agi pei nuk asüng yimten yimsüsürtem shimba nung pelatepa shilem agiba mapang ka asütsüla.

## OLEMSABANG

### Aor Oshi, Kenozülu aser Sobaliru Mulungzüngjemi Kenü Alikintem Mungdang Chiteni, 31st 2024 Shisalu Teratet

#### Okila

Kenü alikintem Mungdang ya Aor oshi, Kenozülu aser sobaliru mulungzüngjemi nung ajemdaker akatsü. Shisashirtem, bushitsüngdangertem, shisaliok riju nung tesayurtem aser inyaksangshirtem, shirnoki oshi, kenozülu aser sobaliru molungzüngjemi tesendaktep aroka angatetnür aser bushitsü jangrar, parnok asoshi iba mungdang ajanga sabang lapoktsütsü. Tanü alima ajunga yimtsüng ka akümba putu aser sobaliba jenti meyokteper ka dang akümba tensa ka nung kin ka oshi, kenozülu aser sobaliru molungzüngjemiwazüka ayutsü indang iba mungdang ajanga tali jangjadaktsütsü. Yimlar, iba mungdang ajanga, nütüng nübortemi oshi, kenozülu aser sobaliru molungzüngjemiindang senti senmang aser tapu balala indang jangja metettsü aser pelaa agizüktsü.

#### Ao Naga Indang

India lima anüdoklen tip, Nagaland State nung Naga nunger lisopur telok rongnung Ao Naga nunger yaa tongti kin ka lir. Aorji sobaliba senmang nung takar, sobaliru tebetet aser lokti liru tewangwang. Aori jembiba oshiji Tibeto-Burman shilu nungi lir. Aor sobalibaji amungtsümung tarok, benjongbentsü tewangwang aser tetsütebou yimsü nung ken-tsüngsang ajanga shisangdaksür aser item yagi Aor lokliliru nung shilem tongtibang agir. Tang tashi nung Nagaland University kübok undergraduate level nung Ao tenren sayuba dak alaka bushitsüngdangba ajema lir.

#### Ocet zülutsü jaoker

Meimchir sobaliba aser tongtepratepa nung oshi, kenozülu aser sobaliru molungzüngjemi tesendaktep ya pilatsü makok, kechiyong kati ka len anishir aser tabensaba kümdaktsür. Anungji iba mungdang nung item shisalu asem bushitsüngdangba aser aroka shisadangba ajanga koda sür Aor lokti, maitsü aser sobaliru alima jakdang shisanger ta asüba lenla aisü nung ocet zülua lemsateptsü jaoker. Shisalu asem dak ajemdaker ano agütsüa aliba onüktem nung bushitsüngdanga shilem agitsü sangdonger:

- \* Oshi melenshia ainba yayim (Dynamic nature of language)
- \* Aor oshioben tenüktelen yayim (Linguistic structure of Ao)
- \* Kenozülu ajanga Aor loktipuin, yimsü aser tejangraba koda sayur bushitsüngdangtsü (Literature as a reflection of societal values, beliefs, and aspirations)
- \* Putu ka nungi putu ka dangi kenozülu ajanag sobaliba senmang wazüka aser belenzüka yutsüba (Literature in preserving and transmitting cultural heritage across generations)
- \* Aor sobaliru molungzüngjemiajanga kechi shisangteter aser kechi shilem agir, itemji bushitsüngdangtsü (Explore the significance of oral tradition)
- \* Tebang o ajanga belenzüka aruba oyimtem wazüka ayutsü aser züluyutsü asoshi tebilemstütem aser maongkatem kechisa lir, itemji shidangtsü (Challenges and opportunities of preserving and documenting oral narratives)
- \* Oshi, kenozülu aser sobaliru molungzüngjembitesendaktep (Interaction of languages, literatures, and oral traditions)
- \* Kenozülu aser mulungzüng olenyim tesendaktep (Phenomenon of translation and its impact on literary works and oral narratives)
- \* Kija taküm aser lokti maitsü nung oshi, kenozülu aser sobaliru molungzüngjemiajang terenlok shilem agiba (Contribution of language, literature, and oral tradition to the construction of individual and collective identities)
- \* Tezüluba aser tabang o keno tendak meimchir nem temeden ola agütsüba (Representation and voice within literary and oral contexts)
- \* Technology ajanga akhiren otsüdong aser züluyim melenshidaktsüba (Role of technology in reshaping traditional storytelling methods and literary forms)
- \* Tebang o ajanga belenzüka aruba oyimtem wazüka ayutsü aser züluyutsü asoshi tebilemstütem aser maongkatem kechisa lir, itemji shidangtsü (Challenges and opportunities of preserving and documenting oral narratives)
- \* Oshi, kenozülu aser sobaliru molungzüngjembitesendaktep (Interaction of languages, literatures, and oral traditions)
- \* Kenozülu aser mulungzüng olenyim tesendaktep (Phenomenon of translation and its impact on literary works and oral narratives)
- \* Kija taküm aser lokti maitsü nung oshi, kenozülu aser sobaliru molungzüngjemiajang terenlok shilem agiba (Contribution of language, literature, and oral tradition to the construction of individual and collective identities)
- \* Tezüluba aser tabang o keno tendak meimchir nem temeden ola agütsüba (Representation and voice within literary and oral contexts)
- \* Technology ajanga akhiren otsüdong aser züluyim melenshidaktsüba (Role of technology in reshaping traditional storytelling methods and literary forms)

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Turkey nung ano Tenla ki ka mosque kuma yanglushir semzük



Turkey nung Aso 4buba mapang Constantine the Great-i asüba Church of the Holy Saviour noksa nung angur.

**May 12, 2024:** Akhidang Byzantine mapang aliba Tenla ki ka agi mosque kuma yanglushiba tekülem ki ka Turkey Tir, Recep Tayyip Erdogan-i semzüksüogo.

Chora nung aliba Church of the Holy Saviour Tenla ki ya United Nations World Heritage Site ka lir. Iba Tenla ki mosque kuma yanglushir tan hopta semzükba atema Greece sorkari sashia aitsüogo.

2020 kum nunga Turkey nung Hagia Sophia Tenla ki agi mosque kuma yanglushiba atema alima linüktemi Turkey sashia aija liasü.

Istanbul kübok Fatih district nung akhidang yimti jara anasa yangluba Holy Saviour Tenla ki dangji parnoki 'Kariye' ta ajar.

Greek Orthodox Easter amongba iba mosque semzükba atema Greek Foreign Ministry-i sashia aitsüogo.

"Turkish ketdangsertemi Chora nung aliba Tenla ki agi Muslim nung mosque kuma yanglushiba ya ajanga linüktem jashidaksür, kechiyong iba ya ajanga meimchirtem ajak meyong UNESCO World Heritage Site raksatsür," ta Greek Foreign Ministry-i

metetdaksü.

"Nüingshi kiojentem anepaluba den külemi yimsü aser sobaliba senmang wazüka ayutsüji linüktem ajak teinyaksü shilem lir," ta parnokisa metetdaksü.

Holy Saviour Arogo Tenla ki ya Aso 4buba mapang nung Constantine the Great-i asü aser 1453 kum Ottoman Turks-i Constantinople maakdokba sülen kum 50 shi lir Kariye Mosque kuma yanglu.

1945 kum Turkey sorkari iba kiojen agi museum kuma yanglushi aser 1958 kum nüburtemi reprangtsü atema lapokja liasü.

Tan hopta Turkey Tir, Erdogan-i Ankara nungi iba mosque tasenba semzüksüogo.

Iba sentong nungji jembidang Erdogan-i, "Iba ya ajanga tia tajung bener arujang," ta ashi.

Turkey nung General Directorate of Foundations-i iba sentong ayongzük aser Istanbul nung mufti, Safi Arpagu?-ia onük jembia liasü.

2020 kum World Council of Churches-i Turkey Tir, Erdogan dang Hagia Sophia museum agi mosque akümtsü telemetba agibaji agienang ta mepishia

liasü.

Arogo 350 aser Khristan züngsem million 500 aliba World Council of Churches-i Erdogan dang shidi ka ajanga, iba telemetba ajanga lokti nung telemesa adokdaksütsü, ta metetdakja liasü.

Hagia Sophia ya 537 kum tenzüka liasü; iba mapang nung Byzantine Chuba Justinian-i Hagia Sophia ya Tenla ki ka ama yanglu aser putu aika Byzantine nung meyong liasü; 1453 kum Ottoman Chuba, Mehmed II-i Istanbul (taoba mapang Constantinople ta aja) amakba sülen Muslim nungertemi Hokolbar shia Hagia Sophia nung sarasadem agia aru.

Kobi melii Ottoman nungeri Hagia Sophia ya mosque kuma yanglua Yisu Khrista temaitsütemji Arabic tamangba ozülü balala agi nembanga liasü.

Turkey linük ya secular linük ka akümtsü atema 1934 kum Hagia Sophia ya museum ka kuma yanglu, ajisüaka 2020 kum July ita nung Turkey court kati iba ya mosque kuma yanglutsü atema oshidang agüja liasü.

## China nung Underground Arogo lenir ana jail nung kanga timtemdar

**May 12, 2024:** Yaküm China kübok Hefei, Anhui nung aliba Ganquan Arogo nung lenir ana apuba sülen nungi tena kinüngtsü aser Arogoi China ketdangsertem dang tenaprong chiokang, ta mepishia arudar, ta International Christian Concern (ICC)-i metetdaksü.

Jail nung tena temang tamajungba akümiba sülen nungi balaka Arogoi ketdangsertem dang tena chioktsü kanga mepishidar.

Yaküm November ita nung Communist ketdangsertemi Pastor Zhou Songlin aser deacon Ding Zhongfu na den Arogo züngsem 14 pua liasü. Tangartembo ajak chiok saka Pastor Zhou aser deacon Ding nabo tang tashi tepuokdak lir.

Pastor Zhou mejangjaba tashidak agi kanga shiranger aser doctor temia pa jail nung

liabo treatment junga magitetsü, ta shiogo.

Pastor-ia pa jail nung liabo mesüner aser jail nung asütsü tsübur ta shiogo.

Ano külen deacon Ding-a high blood pressure agi shirangba den külemi teko ayangashir, mangmanger aser amoi mouteti timtemer.

Ganquan Church ya underground Arogo ka lir. Parnoki Communist sorkari melaba Three-Self Patriotic Movement (TSPM) nung register asütsü memelungba agi mapang shia sorkar ketdangsertemi parnok anema inyaker.

Ganquan Arogo ya ozüng alema tentetba Arogo ta züngshir anungji kimong alitsü atema Arogo nem temelaba magütsü. Ibayongji Pastor Zhou aser deacon Ding nati

tena tenüng amshia Arogo sen agi Arogo atema kimong ana alizüka liasü.

Ibayongji pastor aser deacon nati ashikülak mapa inyakogo, ta tena aitsü.

Zhou aser Ding na kinüngtsütemia temeja shidi ka ajanga sorkar ketdangsertem dang tenaprongla chioktsü mepishio.

"Küm 20 tejaklen Ganquan Arogo ya Khristan tamang nung ajemdaker tenteta liasü aser Arogoi Laishiba nung dang ajemdaker tesayuba agütsür. Arogoi senotsü kanga junga ketdangsüa amshir; deacon Ding leniba nung Arogo senotsü timi amshir. Arogo menden nung o lemtepa sülen ang pastor aser Ding na nungtem nung Arogoi kimong alizüka liasü," ta Arogoi metetdaksü.

## ANOGO ABEN TSÜNGREM DEN

## Tabensa Nükjidong

- T. Ken 138: 1-8

"Kibubai kü sentong renemtsütsü, Ne yimlibilem, o Kibuba, teti alir, Ne ket agi amtakba mapa nai mechioktsü" (t.8). Asenok nisung shia taküm asoshi Tsüngrem sentong ka lir. Shidakba nung, pai asen kotak nung khujang ajak züngtetta lir (matt. 10:30). Tanü Tsüngrem asen nungdak meteta lir. Pai asenok asoshi bilemstür, pa teka mapa asenok lir.

Tsüngremi asenok asoshi bilemba kodang abensadaksür? Pai kodang asen taküm nung mapa inyaksü yimlar? Mezüngbuba, kodang asenoki Pa tenüng sangdir. Tekong 1 nung ashir, "Kü mulung ajak agi ni ne nem tenüngsang agütsütsü. Tsüngremtem madak ni ne nüngsang atentsü". Tekong 2 nung azünger, "Ni Ne temeshi tenla ki tsütsü külemstü. Aser ne temeim yimlibilem aser ne atangji asoshi ni ne tenüng nung tenüngsang agütsütsü". Kodang asenoki Tsüngrem külemba aser tenüng asangba nung mapang agidir, pai asenok asoshi bilemba abensadaksür. Saka asenoki asen leman nung ora, asenoki Tsüngrem nungi temoatsü samar.

Kodang asenoki sarasadem Tsüngremi asenok atema bilemba abensadaksür. "Ni na ajaba anogo nung nai kü dang langzü, Nai kü nela nung tashi agüja ajungshi"(t.3). Iba yagi Tsüngremi tema tiaji melenshitsür ta mashir. Pai ken zülur telunglen melenshitsü. Kodang asenoki Kibuba külemdir aser pa dang ayimtendir, pai asenok tenüng nung mapa inyaksü akok.

Tatemesa, kodang asenoki pa sentsüwangshidir pai asenok atema bilemba abensadaksür. "Alima chuba ajaki ne nem tenüngsang agütsütsü, O Kibuba kechiyong parnoki ne bang nungi o angashiogo. Au, parnoki Kibuba lemanngtem indang ken atentsü. Kechiyong Kibuba sentsüwangshi tulu lir"(t.4,5). Tangar dang Tsüngrem tenüng asangbaji asenok sensaksemba yimya shilem ka asütsüla.

Alima nung Tsüngremi ne kija taküm asoshi mapa inyaksü jangrar. Kodang nai pa dang sarasademba ajanga, pa sentsüwangshiba ajanga, pa asoshi kuli asüba ajanga aser pa nem bendanga agütsüba ajanga, pa kulemdir, Pai ne tenüng nung mapa inyaksü. Tanü nai tasen kümshiba temoatsü nungdakra, pa dangi meyipang. Pai agütsütsü.

## Kohima Liangmai Baptist Arogo nung Tetsütem anogo among

**Kohima, May 12 (TYO):** pei atema mebilemi temeim Amongnü Kohima Liangmai mapa inyaker. Tetsü ka Baptist Arogoi "Mother's as a nurturer of faith" omen nung anguba mesüra bilemba ajanga ajemdaker Tetsütem anogo asadanger masü saka Laishiba mongogo, ta Rutmakbo Media nung aliba chichiba Tsüngrem Cell, Kohima Liangmai Baptist metetba ajanga dang la Church sangdong ajanga tamang jenjang asadanger," ta metetdaksü. lai ashi.

Loktiliba nung tongtibang shilem agir aser temeim sayua tenla tajung agütsür tetsütem nem akhüm agüja iba sentong ayongzüka mongogo.

Iba sentong nung jembidang youth pastor tasenba, Kungkam Newmai-i, kibong nung kinüngburtem aser tanurtem atema tetsütemji tashi angudak lir, ta ashi.

"Kibongtem nung tajung adokdaksütsü atema tetsü kati

"Tetsü ka sarasadem ajanga timtem nungi kümzüker, tensa melenshidaksür, taneptsü angur aser sayatena atalok tenzükdaksür," ta lai ashi.

Iba anogomong sentong ya Arogo nung deacon Wigiang Chawang leniba nung agi, pastor Rev. N. Silubo Pastor-i tetsürtem atema sarasademstü aser Sunday school tanurtemi ken ka ajanga tetsütem nem tetushi agütsü.

AO OSHI ANGAZÜKDAK: TANÜ ANGAZÜKTSÜBA OJANG



Süngra

(n) süng tulu alendang atemba sabang, süng tulu teloki apuloktsü atema aralokba süng (platform made to cut big tree or apparatus to carry log)

\* Süngra temer süng tuluka lensük aser süngra yanglur onoki apur yimtaki bener adok.

Süngra

(n) süng tera (roots)

\* Ayongküm nung süngra aika alua liasü.

OLONG PAITEP # 6785

Grid for crossword puzzle #6785 with numbers 1-24.

TIPLÉN

- 1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzungludenkülemi tsüker - (3)
17. Aso tila - (6)
20. Tashi maküm - (4)
24. Tenüng kasa jalepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O lamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. --- tatsü - (3)
12. Tebur kidong aser zunga kasa tsüngda jalepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6784 TELANGZÜBA

TIPLÉN :

- 2. Pongsen, 5. Lepko, 7. Omen, 8. Maangka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.

NAI-A YA METETTER MA



12th May, 2024: Nepal nunger nüngtugu tenemi atur Kami Rita Sherpa-i Mt. Everest-i 29benbuba tua pai taoba mapang record yanglur aliba ajateta otsü tasen ka yangluogo. Nepalese Ministry of Tourism and Civil Aviation, Tourism Department Director Rakesh Gurung-i ashiba agi, arishi küm 54 tain tenemi atur ya Deobar anepdang 8,849-metre peak tongogo. Iba sentong ya Seven Summit Treks-i ayongzük aser tenemi atur 20 densema liasü.

Arunachal: NGO temi Yagamso ayong merektet



Itanagar, Monupii/May 12

(Agencies): Local NGO tem aser Itanagar Smart City Development Corporation la longjemer Arunachal Pradesh kübok Energy Park ajanga ayimba Yagamso ayong nungi jana seret 4,500 intokogo. Iba ayong merektetba sentong ya Honibarnü ayongzüka agia liasü.

Iba merckmeju sentong nung Youth Mission for Clean River (YMCR) aser Abralow Memorial Multipurpose Society nati shilem agi, aser parnoki ayong merektetba dang masü saka ayong kümbang anenzüka aoba nungi kümzüksü atema gulmohar aser nahar süngtong

temja liasü. Itanagar Municipal Corporation Ward 6 Corporator Gyamar Taz-i, Yagamso ayong merekteta ayutsü atema bendanga agüja inyakba atema NGO tem nem tenüngsang agüja liasü. Paisa, ayong nung jana tali akümba süoki ia bilemba lemsatepba den Itanagar nung alirtem dang janga kanga kümdanga intoktsü ayongzüka liasü.

"Yagamso ayong ya kanga temerek liasü. Tia maka iba ayonga ya kanga menena kümogo. Taruba putu atema tzümopung aser yimti mereka toktsütsü atema asenok ajak khuret lir," ta Corporator Taz-

i ashi. YMCR mendenbuba SD Loda-ia, ayong mereka ayutsü koda tongtibang iba indang lemsatepa liasü. YMCR organizing secretary Keyom Doni-i, corporator nem Yagamso ayong merektetsü aser waste management dak sendakba nung tangazükba balala agütsütsü atema NGO sentong aliba metetdakja liasü.

Doni-isa, YMCR-i itashia school tanurtem atema art aser literary sentongtem ayongzüka katsür, aser iba den ayong kümba nung alirtem kishiai tua jana kanga kümdanga intoktsü atema tangazükba agütsürdar ta ashi.

Tripura nung Bangladeshi tsür ti aser India nunger ka apu

Agartala, Monupii/May 12

(Agencies): Tripura nung ketdangsürtemi India nunger ka densema Bangladesh tsür ti puogo. Government Railway Police (GRP) aser Railway Protection Force (RPF) na longjemer Agartala Railway Station meita aoba mapang item tetsürtem ya pua liasü.

Bangladesh tsürtem ya Mumbai-i oya aliba Kanchanjunga Express nung mener aotsü meranga lia apu.

Police sources-i ashiba agi, Bangladesh tsürtem ya as Tania Hasan Seikh, Sathi Khatum, Surmi Sheikh, Ruma Sheikh, Rejuwan Sheikh, Beauty Khatun, Supriya Sheikh, aser

Majeda Biswas Pinky ta jangjaogo aser parnok ya Bangladesh nung Sepahijala District kübok Sonamura sub-division nungi Tripura-i ozüng alema ait asütsü ta temulung meleme bilemer.

Temulung malemtsüsa inyakyim kar indang osang angazükba sülen ketdangsürtemi railway station nung surveillance operation ka amenokja liasü.

"Parnok inyaksangshi ajanga temulung meleme bilem aser ibayongji ken o ashishitsü atema parnok sota ayu," ta GRP officer, Tapas Das-i ashi.

"Ken o ashishiba sülen parnok mapa bushitsü atema Sealdah

ajanga Mumbai aser Pune-i aotsü sentong aliba nguteta liasü. Parnoki Comilla, Bangladesh nungi ozüng alema aitba nangzüka liasü," ta Das-i ashi.

Kasa mapang nung India nunger Sentu Kumar Deb-a puogo. Pai item tetsürtem nem teyari agütsü asütsü ta temulung meleme bilemer. Ketdangsürtemisa item nisungtem anema temzüng ozüng dak ajemdaker inyakyim tenzükogo, ta ashi.

"Onoki ken o maneni bushisüngdangdar aser ken o ka benokogo. Onoki parnok okadaki anir aotsü aser police ket nung ayutsü mepeshia asüngdangogo," ta Das-i ashi.

Manipur police-i nisung pur aoer KCP-PWG züngsem 6 apu



Imphal, Monupii/May 12

(Agencies): Manipur police commando aser Imphal East district police na longjemer Hokolbar aonung meita aoba mapang pur or aliba lanur ana kümzük aser Kangleipak Communist Party, People's War Group (KCP-PWG) züngsem trok pua liasü.

Itangitertem nungi osang tejangja angazükba sülen police temi aonung 10 ako meta Imphal East district kübok Kshetrigao

Yumkhaibam Leikai nung temelung meleme bilemba tesem ka meita oa liasü.

Operation benoka inyakba sülen Porompat police station kübok Kongpal tesem nung alir Irom Anand (24) aser Ngangom Rohit Singh (24) na kümzükogo.

Pur or aliba asangur ana tebu Irom Kunjeshor aser Ng Iromcha nati Porompat police station nung ken o ka benokba sülen lanur ana ya kümzükba liasü. Jabaso ana ya kasa district

nung Bodhbarnü Thambaokhong Sabal Leikai tesem nungi pur oa liasü.

Iba meita aoba sentong benoka inyakba sülen ano KCP-PWG züngsem trok; Chingkhram Sanajaoba (23), Soibam Sital (24), Maibam Naresh (24), Ningthoujam Ajit (26), Chingsubam Thoungamba Meitei (30), aser Wahegbam Premjit (40) puogo.

Manipur police-i ashiba agi, item nisungtem ya self-styled KCP-PWG commandant Iromcha tetuyuba nung inyakangshia liasü, shiba tang tashi monguteti lir. Pa aputsü atema maneni jenjang agidar.

Police temisa gari ka, motorbike ka, mobile phone pongu aser tashishitsü aketba kuli kaketter nguteta liasü.

# Indonesia tzumetsung nung nisung 28 asu, aika samar bushir

**Jakarta, Monupii/May 12 (Agencies):** Indonesia antiolen volcano agi kongshir aliba tesem nung ajungbena tzumetsung adoka molushi yimzuka aluba lendong nung tanur densema nisung 28 süogo aser aika samar bushir, ta ketdangsürtemi ashi.

Basarnas search and rescue agency ajanga Deobarnü sangdong ka nung ashiba agi, lendong ya West Sumatra province kübok Aga maser Tanah Datar district tem nung ghonda aika tzunglu sashia arur Honibar aonung 10:30 ako nung ataloka ajungben tzumetsung adok aser Mount Marapi nungi cold lava yimzuka alua liasü.

Cold lava dang 'lahar' ta ajar aser iba nungya mitsü, litem aser longsang tila dena lir aser tzunglu aruba ajanga volcano nungi yimzuka bener alur.

Arishi küm asem tanur ka aser arishi küm ti tanur ka densema nisung 28 asü, ta provincial rescue agency nung tekolakba Abdul Malik-i osangbener dang ashi.

Agam district nung nisung pezü samar bushir, ta paisa ashi.

"Tanü onoki district ana nung maneni bushitsü."

Social media nung prokshiba noksa aser video tem nunga West Sumatra nung lenmangtem long tulu aser molushi agi meyibanger aliba nguogo.

Kasa asetkong nung tzumetsung tesashi ka arur ita ana dang lir ano iba lendong ya ajurur.

Samar alirtem reprangtsü aser nüburttem tesem balalai belentsü atema ketdangsürtemi tekumzükertem aser ngisa agi yangluba rong tilatem yokogo.

District ana nung sorkar ketdangsür temi evacuation centres aser emergency posts tem amenoka lir.

Meyi mapang Indonesia nung anentsüh aser tzumetsung kanga bolua ajurur.

Taoba hopta South Sulawesi nung anentsüh aser tzumetsung agi nisung aliba ki aser lenmang raksatsüba mapang nisung 15 asü.

March ita nunga West Sumatra nung anentsüh aser tzumetsung agi kongshiba sülen nisung 26 tasü ngutet.

December ita Mount Marapi nungi volcano pokteta adoka university students timba sür nisung 24 asü.

Ano Honibar nikongdang Indonesia indang asetkong tulutiba, Java nung kaketshir 60 dak tema aser tesayurtem mena aliba bus ka tsükoka nisung 11 asü aser aika yirua liasü.

# UK-i Israel dang nok-nü ayokba anenra Hamas ajangzüksü: Cameron



**London, Monupii/May 12 (Agencies):** UK-i Israel dang nok-nü ayokba anenra Hamas dang tashi itshitsü, ta UK foreign secretary Lord Cameron-i ashi.

Gaza kübok Rafah yimti nung sashia amaktsübo memulunger saka US-i nok-nü ayokba anenba sülenbo UK manidaktsü, ta pai ashi.

UK-i Israel indang nok-nü shilem ka dang agütsür ta pai ashi aser civilian tem kumzuka humanitarian aid aiddaktsütsü asoshi tali inyaktsüla, ta pai ashi.

Labour party nungi Jonathan Ashworth-ibo Rafah nung British nungeri yangluba nok-nü mamshidaktsüner ta ashi.

Israel-i Gaza south tsütsü Rafah yimti amaktsü sentong aliba ama inyakra US-i nok-nü magütsütsü, ta tan hopta tetenzüklen US Tir Joe Biden-i shia liasü, kong nisung million 1.4 shi jenoka lir.

Hombarnü nungi tenzuka nisung 80,000 dak tema Rafah nungi jena ogo aser Israel

indang tanks tem yimti telung nung aita lir ta UN-i ashir.

Rafah amakba ajanga civilian aika asütsü ta US aser danga tembar linüktemi tekumdangtsü shiaka Israel-i amaktsü ta ashir.

Israel Ato Kilonser Benjamin Netanyahu-i Hamas battalions samatsütsü nangzuka lir aser itemji Rafah nung amenoka lir ta ashir.

Israel-i nüburttem kumzuka ayutsü sentong ka mangu tashi Rafah nung tashiyim ajak amshia amaktsü nibo memulungtsü, ta Lord Cameron-i ashi.

Saka US yabo UK dang nungi khenyongi balaka, kechiaser parnok ya nok-nü jenti agütsüba linük ka lir, ta pai ashi.

"Nok-nü agütsüba yimya melenshir ta sangdongba ajangabo Hamas ang tali tashi taitba akumtsü aser pua alirtem chioktsü asoshi jembishinüba nung tamakok ang ajurutsü," ta pai ashi.

# Afghanistan tzumetsung nung asür nisung 300 alemogo



**Kabul, Monupii/May 12 (Agencies):** Afghanistan north tsütsü tzumetsung nung asür nisung 315 jungogo aser nisung 1,600 dak tema yirua lir, ta Taliban indang ministry for refugee ajanga Deobarnü ashi.

UN indang World Food Programme (WFP) ajanga nisung 300 dak tema süogo aser aoka samar bushir ta sangdonger anogo ka lir Deobarnü iba osang ya sangdonga liasü.

Asürtem züngdangba kanga kera züina aor, aser Taliban indang Ministry of Interior Affairs-ia tzumetsung nung nisung 150 shi süogo ta Deobarnep sangdonga liasü.

WFP ajanga ashiba agi, Baghlan province nung tamajungtiba kongshi aser yangji nisung aliba ki 1,000 dak tema raksaogo.

Hokulbarnü tzunglu kanga sashia aruba ajanga linük tesem aika nung tzumetsung adoka liasü.

"Iba tzumetsung lendong nung nisung noklang aika takum samaogo aser yirura aika lir," ta

Taliban sorkar indang chief spokesman Zabihullah Mujahid-i Deobarnü social media post ka nung shia liasü.

Baghlan dak alaka northeast tsütsü Badakhshan province aser central Ghor province aser anüolen Herat province tem nunga tzumetsung agi kanga sashia kongshi aser senotsü aika jenjang takoksa ajurua lir, ta pai X nung zülua liasü.

Baghlan kisung nunga nisung 200 dak tema asü aser nisung aliba ki meyirijang aika raksaogo, ta UN indang International Organization for Migration (IOM) ajanga osangbener dang Honibarnü shia liasü.

Air force ajanga yirur aliba nisung 100 dak tema military hospitals nung anir oa lir aser tzumetsung agi kongshia alirtem anir ainshi tenzükogo, ta Taliban Ministry of Defense ajanga Honibarnü sangdong saka province tem tenüngo mashi.

"Tzumetsung agi kongshia aliba tesemtem nung state of emergency sangdonga Ministry of National Defense-i

chiyongtsü, mozü aser first aid lema agütsü tenzükogo," ta parnoki sangdong nung ashi.

Baghlan indang natural disaster management department tekolakba, Hedayatullah Hamdard-ia asürtem tali akumtsü aser province kübok district aika nung tzunglu aruba manener, ta shia liasü.


Tawa tzunglu kanga sashia aruba ajanga aoksa tzumetsung adokba mapang nüburttem renema meliasü, ta pai ashi.

Emergency personnel temi molushi aser ki o jen teraksa nung asü-amartem bushir aser national army aser police nungi security forces temia yariteper, ta Hamdard-i ashi.

April ita tiyonglen ka nungi Afghanistan indang province 10 nung nisung 100 shi tzumetsung agi süogo aser region kata nunga mokongshiba mali, ta ketdangsürtemi ashir.

Nisung million 40 dak tema aliba Afghanistan linük nung shilem 80 dak tema aluyimba nung metaloker alir, aser alu aika tzü agi mubanga lir.

# Gaza nung ceasefire atema Hamas dak keta lir: Joe Biden



**Medina, Monupii/May 12 (Agencies):** Telungpur temi pua alirtem chiokra Israel-Hamas rara nung ceasefire ya asünga sangdongtettsü, ta US Tir Joe Biden-i Honibarnü ashi.

"Hamas-i pua alirtem chiokra asünga ceasefire alitsü," ta Biden-i Seattle nung fundraiser ka nung ashi. Hokulbarnü kasa sentong ya asemen agiba nung pai iba o ya mesüoki liasü.

"Israel-i ibai Hamas dak keta lir ta ashir, parnoki inyaknura, asünga tembangtettsü. Aser ceasefire ya asünga tenzüksü," ta Biden-i ashi.

Gaza south tsütsü Rafah yimti nung Israel sepaitemi makra parnok nem artillery

shells aser danga nok-nü agütsüba anentsü, ta Bodhbarnü Israel dang tekumdangtsü shir iba ken o ya benok. US bomb tsükdaktsüba ajanga civilian aika tepsetogo ta pai ashi.

"Parnok Rafah-i ora, parnok nem parnoki amshia aliba nok-nü magütsütsü," ta Biden-i shia liasü.

"Parnoki amshia aliba nok-nü aser artillery shells tem onoki magütsütsü."

Ken o aiben jemiabiaka Hamas aser Israel tsüngta ceasefire alitsü tangatettep kati maruteti lir.

Hamas telungpuri Israel south tsütsü October 7 nü amakdang nisung 250 shi Gaza Strip nungi pua bener ao.

Israel ketdangsürtemi Palestinian territory nung tang tashi nisung 128 pua yua lir aser item rongnung nisung 36 süogo ta ashir.

Iba mapang Hamas-i amakdang civilian timba sür nisung 1,170 dak tema asü.

Iba tayang kepzuka Israel-i Gaza nung amakdang nisung 34,971 shi tepseogo ta Hamas meyong health ministry ajanga ashir.

# Aman Sehwat-i Paris Games quota ngutetogo



**Monupii/May 12, 2024 (Agencies):** Imla aliba ama Aman Sehwat-i Honibarnü Istanbul nung World Qualifiers nung kanga junga asaya tebur freestyle 57kg category nung Paris Olympics quota ngutetogo. Ajisüaka Deepak Punia bo mezüngbuba round nung tsüka liasü.

U23 world champion Aman ya senior Asian Championship koker aliba asayar ka lir aser pai junga asayatetsü imla aliba ama asayatetogo.

Arishi küm 20 tain Aman, shiba Chhatrasal stadium nung training agir, pai bouts asemprongla nung point ter

dak tema angu aser asaya anabo technical superiority agi koka liasü.

Pa ya Paris Olympics atema qualify asüba India nung tebur wrestler mezüngbuba lir aser pai linük maksütsü nungi kümzükogo.

Tokyo Olympics silver medallist Ravi Dahiya-a 57kg category nung tokteper aser WFI-i trails agitsü atema telemtetba agira Aman, Paris nung oa asayatsü atema pa den tokteptsüsa akümtsü.

Kasa mapang nung Sujeet Kalkal-i kanga tenüng asangtsü langa asayatetogo. Pa tebur 65kg semifinal nung Mongolia

nung Asian Games champion aser Asian Championship silver medallist Tulga Tumur-Ochir-i 1-6 agi koka liasü.

Semifinal nung tamakok mangu tsüngda Sujeet-i, 3-2 agi Uzbekistan nung Umidjon Jalolov akok aser iba sülen technical superiority agi Korea nung Junsik Yun koka liasü.

Aman-i Valentinov Vangelov 10-4 agi akok aser iba sülen Ukraine nung Andrii Yatsenko technical superiority agi koka liasü.

Paisa, North Korea nung asayar Chongsong Han12-2 agi ayong ayonga koka liasü.

# Italian Open: Alejandro Tabilo-i Djokovic tsükdaktsüogo



**Monupii/May 12, 2024 (Agencies):** Deobarnü Rome Open tebur kija asaya tasembuba round nung Alejandro Tabilo-i 6-2, 6-3 agi Novak Djokovic tsükdaktsüogo.

Iba asayamung nung otsüsütsüsa Masters 1000 title 41buba abentsü atema Djokovic meranga liasü, ajisüaka Tabilo-i pa sotogo, shiba world ranking nung 32buba nung lir. Tabilo-i tang mezüngbuba top-10 nung aliba asayar ka kokogo.

Anogo ana tejakdang tanabuba round nung Corentin Moutet straight set nung akokba sülen arishi küm 36 Djokovic dak tzü bottol ka agi ona liasü aser tang pa asayamungi tuguogo.

Iba tatalokba sülen Djokovic-i Honibarnü cycling crash helmet ka semer practice süa asaya menüa liasü, ajisüaka Deobarnü pia junga masayatetba ya iba tatalokba ajanga asütsü akok, ta bilemer.

Djokovic kanga kara tsükatokba ya Roland Garros masaya tsüngda iba tatembangbuba tongtambang asayamung asoshi tezüdangtsüka asütsü, kechiyong asayamung tenzükba mapang nungi world number two aser three Jannik Sinner aser Carlos Alcaraz naprongla masayai liasü.

Kasa mapang nung Italy nung fan tem atema taoba mapang Wimbledon finalist Matteo Berrettini aser Lorenzo

Musetti naprongla asayaba ajanga tezüdangtsüka kümduktsüogo. Kasa mapang nung Nadal-a Honibarnü seventh seed Hubert Hurkacz-i tsükdaktsüogo.

Ajisüaka iba asaya akoktsü Tabilo langa liasü. Mezüngbuba set nung minute 20 majung tsüngda Djokovic indang serve ana tashi break süa pa 4-0 agi tejakdang aküm aser iba sülen asaya koka liasü. Chile nung asayar yagi mezüngbuba set ghonda tesadang ka nung kokatok.

Tanabuba set nunga pai mezüngbuba game nung Djokovic indang serve break asü aser iba sülen pa indang career nung asaya tulutiba koka liasü.

# Olympic selection trials: Shooters

**Esha & Anish nati takok nguogo Monupii/May 12, 2024 (Agencies):** Deobarnü Esha Singh aser Anish Bhanwala nati Olympic Selection Trial tanabuba nung tetsür 25m pistol aser tebur 25m rapid-fire pistol (RFP) asaya nung takok nguogo.

Anish-i Delhi nung kasa asayamung nung mezüngbuba trail-a kokogo aser Esha-ia Karni Singh range, Delhi nung tetsür 10m air pistol event tanabuba trail kokogo.

M.P. State Shooting Academy (MPSSA) ranges nung, Esha-i final nung point 43 ngua tetsür 25m pistol trail nung mezüngbuba takok ngua liasü. Lai anguba point ya iba ita tetenzüklen Baku World Cup nung Korea tsür Kim Yeji-i world record yangluba dang nungi point ka agi timba liasü.

Iba asaya nung Manu Bhaker-i point 40 ngua la tanabuba aser Rhythm Sangwan-i point 33 ngua tasembuba jenjang nung tembanga liasü. Simranpreet Kaur Brar aser Abhidnya Patil na pezübuba aser pongububa jenjang nung liasü.

Tebur RFP final nung Anish-i kanga junga asaya aser tetenzüklen pai perfect series asem angu. Pai pezüben dang miss süa point 36 angu aser asaya koka liasü.

Kasa asaya nung Vijayveer Sidhu-i junga metenzüklet ajisüaka tatemlen junga asaya point 31 angu aser pa tanabuba jenjang nung liasü. Ankur Goel (19), Adarsh Singh aser Bhavesh Shekhawat nung tasembuba, pezübuba aser pongububa nung liasü.

Shooter 10 prongla Olympic Selection Trials nung ano Hombarnü trail pezübuba aser asaya anaprongla nung final atema adenshütsü.

Mezüngbuba trail asem sülen tetsür sport pistol nung Esha Singh jakdang Manu lir aser tebur RFP nung tanabuba jenjang nung alisang Vijayveer dang nungi Anish-i point timba nguteta lir.

# KM Deeksha-i 1500m National Record tasen ka yangluogo



**Monupii/May 12, 2024 (Agencies):** Sound Running Track Fest, Los Angeles nung India tsür track athlete K M Deeksha-i tetsür 1500m asemtepba nung national record tasen ka yangluogo, aser Avinash Sable tebur 5000m asemtepba nung tanabuba jenjang nung tembanga liasü.

Arishi küm 25 tain Deeksha-alizüng 4:04.78 nung tongteta tasembuba jenjang nung tembang aser 2021 küm National Open Athletics Championships, Warangal nung Harmilan Bains-i 4:05.39 nung alizüng tongteta national record yanglur aliba ajatetogo.

Taoba mapang Deeksha indang personal best ji 4:06.07 liasü, koba lai 2023 küm Kalinga Stadium, Bhubaneswar nung National Inter-State Athletics Championships asayaba mapang ajangzükter liasü. Iba asayamung nung lai Bains ajateta gold medal angu.

Deeksha, shiba Amroha, UP

nungi lir, la MP Athletics academy nung shilem ka lir aser la taoba küm pongu tashi coach S K Prasad tawabanga kübok training agidar.

Tetsürtem rongnungisa Parul Chaudhary-i 15:10.69s nung alizüng tongteta la pongububa nung liasü. Kasa mapang nung Ankita-ia alizüng 15:28.88 nung tongteta la 10buba nung liasü.

Tebur 5000m asemtepba nung Sable-i alizüng 13:20.37 nung tongteta tanabuba jenjang nung tembang. Teburtem rongnungisa Gulveer Singh-i alizüng 13:31.95 nung tongteta liasü.

Sable indang 5000m national record mapangji 13:19.30 lir.

Tebur 10000m asemtepba nung Kartik Kumar-i tatembangbuba lap second 62 nung asemzük saka pa tanabuba jenjang nung asaya metembangtet. Pai alizüng 28:07.66s nung tongteta liasü.

Iba asayamung ya World Athletics Continental Tour bronze level event ka lir.

**BILEMDANGANG**  
"Yimjungji teti jangrademtsüka lir."